



Il nov president da Gastro Suisse Casimir Platzer cun Annalisa Giger, la vicepresidente e presidenta ad interim da Gastro Grischun.



Klaus Künzli (san.), il president partent è vegnì undrà dal vicepresident Ernst Bachmann.

In nov president cun ragischs grischunas

Flem: Radunanza annuala da Gastro Suisse

DA GION NUTEGN STGIER / ANR

■ **Er en l'avegnir stat in Bernais al timun da Gastro Suisse, l'uniun tetgala dals ustiers svizzers. Suenter 12 onns sco president è Klaus Künzli sa retratg e vegn proximamain a surdar ses uffizi al successur Casimir Platzer. Quel è burgais da Samignun e ses bab è da Tavau.** Per Gastro Grischun èsi ina vaira onur che Gastro Suisse ha salvà la 123avla radunanza da delegadas e delegads a Flem. Gastro Suisse è ina da las grondas federaziuns professiunalas en Svizra cun stgars 20 000 commembers. A quella federaziun appartegna er Gastro Grischun cun radund 1000 commembers. A l'enschatta d'avrigl ha l'uniun dals ustiers grischuns festivà ses giubileum da 100 onns e l'organisaziun da la radunanza dad ier a Flem è er stada ina part da las festivitads da giubileum. *Annalisa Giger* da Mustèr, la vicepresidente e presidenta ad interim da Gastro Grischun, ha lura er beneventà collegas e

collegs da l'entira Svizra cordialmain en Surselva. Sa drizzà cun pleds simpatics als 220 delegads e delegadas ed als numerus giasts è er *Adrian Steiger*, il president communal da Flem.

In um cun experientscha

Tema central da la radunanza da delegadas e delegads è stada la tscherna dal nov president. Gastro Berna aveva nominà *Casimir Platzer* da Kandersteg e Gastro Basilea Champagna vuleva gudagnar l'elecziun cun ses candidat *Matthias Nold*. Elegì han lura ils preschents il candidat bernais, Casimir Platzer, l'um da 52 onns, che maina cun sia dunna *Muriel* l'hotel Belle Epoque Victoria a Kandersteg. En stgars duas emnas vegn el a surpigliar l'uffizi da ses antecessur *Klaus Künzli*, medemamain in Bernais, ch'è sa retratg suenter 12 onns sco president da Gastro Suisse. Sia lavur excellenta è vengnida ludada ier a Flem e persuentar ha il president partent survegnì la commembranza d'onur. Ses successur, Casi-

mir Platzer ha gia fatg dapi il 1989 experientscha cun federaziuns, associaziuns ed uniuns d'ustiers e hoteliers. Tranter auter è el stà ogt onns president da Gastro Berna ed a medem temp er parsura da l'Uniun dals hoteliers Surselva bernaisa. Dapi il 2004 appartegna Casimir Platzer er a la suprastanza da Svizra Turissem e dapi in onn è il Bernais er president da l'Associaziun internaziunla da hotels e restaurants IH&RA. Dal remiment è il nov president dals ustiers svizzers burgais da Samignun e ses bab è da Tavau.

Nagin representant da noss chantun

Da nov en suprastanza da Gastro Suisse han delegadas e delegads elegì *Massimo Suter*, l'um da 43 onns e president da Gastro Ticino. Gi dad eleger in post en quel gremium han ils preschents cun d'aver ventar Casimir Platzer, sco commember da suprastanza, da nov president. Candidà avevan per il post da suprastanza schi-

zunt trais umens ed ina dunna. Dal remiment è Gastro Grischun dapi 12 onns betg pli represchentà en l'executiva da Gastro Suisse. Il davos represchentant da noss chantun è stà *Andy Abplanalp*, fin l'avrigl da quest onn, parsura da Gastro Grischun.

Dapli acceptanza da la publicad

Casimir Platzer vul cunzunt rinforzar la lavur publica ed il lobbyng politic e cum-batter per la branscha. El pretenda er dapli acceptanza da Gastro Suisse, vul chattar soluziuns adequatas cun ils sindicats e cunzunt er fixar da nov la definiziun Gastro Suisse. «Nus duvrain urgent er meglras cundiziuns da basa», ha ditg Casimir Platzer suenter sia elecziun sco nov president da Gastro Suisse. Ina vaira sfida saja lura er da persvader il suveran svizzer che la branscha da la gastronomia dovria in altra tariffa tar la la taglia sin la plivalur. Far quai vul Gastro Suisse cun ina iniziativa che stat ils 28 da settember en votaziun.



Adrian Steiger, il president communal da Flem durant ses pled.



Horst Salut, president da Gastro Cuira.



Politica e gastronomia unida tar la radunanza da Gastro Suisse a Flem: Joos Biäsch, Jean Pierre Galey e Heinz Brand (da san.).



Il president dal cussegl grond Hans Peter Michel (san.) cun Andy Abplanalp, l'antier president da Gastro Grischun.



Dus ustiers cun corp ed olma: Claudio Bernasconi (san.) da San Murezzan e Roland Häffiger da Fidaz.



L'ustiera Madlen Rominger da Jenaz e Bruno Raselli, l'ustier da Le Prese.



Be il pl bun per ils ustiers da l'entira Svizra.